



REPUBLIKA E SHQIPËRISË
AUTORITETI I KONKURRENCËS
KOMISIONI I KONKURRENCËS

Nr. 918/prot.

Tiranë, më 18.11.2025

VENDIM

Nr. 1227, Datë 18.11.2025

**“PËR VLERËSIMIN LIGJOR MBI “MARRËVESHJEN E BASHKËPUNIMIT
“NDËRMJET PALËVE TË TREGUT TË SIGURIMEVE MBI SHKËMBIMIN E
INFORMACIONIT PËR TREGUN E SIGURIMIT TË DETYRUESHËM TË
PRONARIT TË MJETIT MOTORIK PËR PËRGJEGJËSINË NDAJ PALËVE TË
TRETA””**

Komisioni i Konkurrencës me pjesëmarrjen e:

Znj. Leida MATJA	Zv/Kryetar
Znj. Rezana KONOMI	Anëtar
Z. Durim KRAJA	Anëtar
Znj. Fatjola DELIJA	Anëtar

Në mbledhjen e tij të datës 18.11.2025, shqyrtoi çështjen me:

Objekti: Për vlerësimin ligjor mbi “Marrëveshjen e bashkëpunimit “Ndërmjet palëve të tregut të sigurimeve mbi shkëmbimin e informacionit për tregun e sigurimit të detyrueshëm të pronarit të mjetit motorik për përgjegjësinë ndaj palëve të treta””.

Baza Ligjore: Neni 4, neni 6, neni 24 germa (d) dhe neni 26 i Ligjit nr. 9121, datë 28.07.2003 “Për mbrojtjen e konkurrencës”, (Ligji nr. 9121/2003).

Komisioni i Konkurrencës, pas shqyrtimit të Relacionit të Sekretarit të Përgjithshëm, të Autoritetit të Konkurrencës:

VËREN SE :

1. Në mbështetje të Ligjit nr. 9121, datë 28.07.2003 “Për mbrojtjen e konkurrencës”, Udhëzimit “Për vlerësimin e marrëveshjeve horizontale”, miratuar me Vendimin e Komisionit të Konkurrencës nr. 295, datë 14.11.2013, Byroja Shqiptare e Sigurimit me shkresën nr. 4146 prot., datë 17.10.2025 (protokolluar pranë Autoritetit të Konkurrencës më nr. 918 prot., datë 17.10.2025), ka depozituar “Marrëveshjen e bashkëpunimit “Ndërmjet palëve të tregut të sigurimeve mbi shkëmbimin e informacionit për tregun e sigurimit të detyrueshëm të pronarit të mjetit motorik për përgjegjësinë ndaj palëve të treta”.
2. Afati i marrëveshjes së bashkëpunimit “Ndërmjet palëve të tregut të sigurimeve mbi shkëmbimin e informacionit për tregun e sigurimit të detyrueshëm të pronarit të mjetit motorik për përgjegjësinë ndaj palëve të treta”, sipas Vendimit të Komisionit të Konkurrencës me nr. 751, datë 26.11.2020, përfundon në 26 nëntor 2025.

3. Duke marrë parasysh funksionimin pozitiv që ka treguar zbatimin e marrëveshjes së bashkëpunimit dhe duke pasur parasysh implementimin nga ana e Byrosë Shqiptare të Sigurimit të Vendimit të Komisionit të Konkurrencës nr. 751, datë 26.11.2020, është vlerësuar e nevojshme nga BSHS miratimi i Marrëveshjes së re të Bashkëpunimit midis shoqërive të sigurimit.
4. Palët pjesëmarrëse shprehen se, për zbatimin e kësaj marrëveshje do të përcaktojnë modalitetet për mënyrën e administrimit, por edhe të kontrollit pa tejkaluar parashikimet e kësaj marrëveshjeje, duke siguruar që në asnjë rast zbatimi i marrëveshjes të jetë në kundërshtim me legjislacionin në fuqi në fushën e sigurimeve dhe parimeve të konkurrencës së lirë në treg, marrëveshja të mos kufizojë produktin apo shitjet, të mos ndajë tregun, përcaktojë, apo ndajë primet. Pra në terma konkretë, kjo marrëveshje, sanksionon vetëm bashkëpunimin midis palëve të sigurimit nënshkruese të saj, për mënyrën e shkëmbimit të informacionit por në asnjë mënyrë, përcaktimin e çmimeve apo ndarjen e tregut midis ndërmarrjeve nënshkruese.
5. Objekti i kësaj marrëveshjeje i referohet (i) metodologjisë së përlllogaritjes të tarifave të primeve të rrezikut të zakonshëm bazuar në statistika të konstatuara kolektivisht ose në numrin e pretendimeve, (ii) vendosjen e kushteve të policave standarde të përbashkëta, (iii) mbulimi i zakonshëm për disa lloje të caktuara rreziqesh, (iv) shlyerja e dëmeve, (v) Testimi dhe pranimi i pajisjeve të sigurisë dhe (vi) regjistrat dhe informacioni mbi rreziqet e rënda.
6. Qëllimi i marrëveshjes do të jetë shkëmbimi i informacioneve mes palëve në marrëveshje për mbulimin e risqeve të policave të sigurimit të detyrueshëm të mjeteve motorrike për përgjegjësitë ndaj palëve të treta MTPL e brendshme për vendosjen e standarteve në drejtim të sigurimit të mosfalsifikimit të policave të sigurimit MTPL e brendshme, shqyrtimin e informacionit i cili mund të përfshijë disa llogaritje statistikore duke lejuar llogaritjen e kostos mesatare të mbulimit të një rreziku specifik në të shkuaren ose për siguracionin e jetës, tabelat e normave të vdekshmërisë apo të frekuencës së sëmundjeve, aksidentet dhe invaliditeti, ose të tjera të lidhura me MTPL, të cilat bëjnë të mundur përmirësimin e njohurive mbi rreziqet dhe lehtëson vlerësimin e rreziqeve për kompanitë individuale, duke mos penguar në asnjë rast konkurrencën mes palëve. Për të rritur transparencën dhe shkëmbimin e informacionit në kohë reale dhe respektimin e primit të depozituar në AMF, nga të gjitha palët, shoqëritë e sigurimit nënshkruese të kësaj marrëveshjeje pranojnë që për çdo police sigurimi të leshuar të evidentohen qartë elementet identifikues të secilit operator, logo, nr. serial, nënshkrimin e operatorit dhe kodin e AMF-së, si dhe arkëtimin në kohe reale të primit të sigurimit. Këto specifikime në rast zbatimi korrekt në praktikë, bëjnë të mundur mosfalsifikimin e primeve të miratuara nga AMF, duke mos cënuar në këtë mënyrë për asnjë moment konkurrencën e lirë në treg si dhe duke i dhënë mundësi klientëve të zgjedhin lirisht dhe në çdo moment të sigurohen në atë shoqëri sigurimi që dëshirojnë duke mos favorizuar në asnjë moment asnjë nga palët e kësaj marrëveshjeje.
7. Palët pjesëmarrëse në marrëveshje shprehen se nuk do të shkelin asnjë nga parashikimet e Ligjit nr. 9121, datë 28.07.2003 “Për mbrojtjen e konkurrencës” dhe akteve të tjera nënligjore.

8. Në zbatim të Udhëzimit “Për vlerësimin e marrëveshjeve horizontale”, marrëveshja e bashkëpunimit ndërmjet shoqërive të sigurimit mbi shkëmbimin e informacionit në tregun e sigurimit të detyrueshëm MTPL përbën një marrëveshje horizontale, pasi palët në marrëveshje janë ndërmarrje konkurrense që ofrojnë të njëjtin produkt sigurimi.
9. Nga analiza e objektit të marrëveshjes rezulton se marrëveshja synon shkëmbimin e informacionit vetëm për qëllime statistikore dhe historike mbi tregun MTPL, që lidhet me analizën e riskut, llogaritjet e kostos mesatare të mbulimit të një rreziku të kaluar, të dhënat mbi aksidentet, vdekshmërinë dhe invaliditetin, si dhe çdo informacion tjetër statistikore i ngjashëm që lidhet me natyrën e produktit MTPL. Marrëveshja nuk përmban dispozita që krijojnë detyrime apo koordinim në përcaktimin e çmimeve/primeve, kushteve të shitjes apo ndarjes së klientëve dhe parashikon ndalimin e shkëmbimit të të dhënave të ndjeshme konkurruese. Për rrjedhojë, marrëveshja nuk paraqet kufizim të konkurrencës sipas objektit.
10. Vlerësuar në këndvështrimin e efekteve potenciale mbi tregun, shkëmbimi i informacionit në formën e përshkruar nuk bën të mundur koordinimin e sjelljes së palëve në treg ose unifikimin e primeve. Ky shkëmbim synon përmirësimin e njohurive dhe vlerësimin e riskut nga secila shoqëri sigurimi, pa krijuar një koordinim të sjelljes dhe pa kufizuar konkurrencën në treg. Për këtë arsye, marrëveshja nuk gjeneron efekte të pritshme kufizuese mbi konkurrencën.
11. Për sa më sipër vlerësohet se marrëveshja është në përputhje me Ligjin nr. 9121/2003 “Për mbrojtjen e konkurrencës”, dhe Udhëzimin “Për vlerësimin e marrëveshjeve horizontale”, miratuar me Vendimin e Komisionit të Konkurrencës nr. 295, datë 14.11.2013.

PËR KËTO ARSYE:

Komisioni i Konkurrencës, bazuar në nenin 4, nenin 6, nenin 24 germa (d) dhe nenin 26, të Ligjit nr. 9121, datë 28.07.2003 “Për mbrojtjen e konkurrencës”,

VENDOSI:

- I. Marrëveshja e bashkëpunimit “Ndërmjet palëve të tregut të sigurimeve mbi shkëmbimin e informacionit për tregun e sigurimit të detyrueshëm të pronarit të mejtit motorrik për përgjegjësinë ndaj palëve të treta”, për nga objekti dhe qëllimi është në përputhje me Ligjin nr. 9121, datë 28.07.2003 “Për mbrojtjen e konkurrencës” dhe me Udhëzimin “Për vlerësimin e marrëveshjeve horizontale”, miratuar me Vendimin e Komisionit të Konkurrencës nr. 295, datë 14.11.2013.
- II. Në marrëveshjen e bashkëpunimit “Ndërmjet palëve të tregut të sigurimeve mbi shkëmbimin e informacionit për tregun e sigurimit të detyrueshëm të pronarit të mejtit motorrik për përgjegjësinë ndaj palëve të treta”, të shtohen kushtet dhe detyrimet si më poshtë vijon:
 - i. marrëveshja mos të kufizojë produktin MTPL apo shitjet;
 - ii. marrëveshja mos të ndajë tregun apo klientët që blejnë produktin MTPL dhe;
 - iii. ndërmarrjet pjesëmarrëse në këtë marrëveshje bashkëpunimi në asnjë rast nuk duhet të dakordësohen për primet e shitjes, të zbatuara për produktin MTPL.
- III. Në pikën II.2 “Qëllimi i marrëveshjes” të ndryshohet dhe të shtohet:
 - i. Qëllimi i marrëveshjes është rritja e efikasitetit në trajtimin e dëmeve dhe uljen e numrit

- të mjeteve të pasiguruara;
- ii. Shkëmbimi i informacionit do të kufizohet vetëm në të dhënat statistikore dhe të përmbledhura, për të përmirësuar njohuritë mbi rreziqet dhe vlerësimin e riskut nga secila ndërmarrje, pa penguar dhe kufizuar konkurrencën në treg si dhe vendimmarrjen e pavarur të palëve;
 - iii. Periudha kohore për të cilën do të shkëmbehet informacioni me qëllim realizimin e llogaritjeve të përbashkëta, tabelave dhe studimeve të përbashkëta.
- IV. Në pikën II.3 “Detyrimet e palëve” të ndryshohet dhe të shtohet:
- i. Palët kanë detyrimin që të mos japin asnjë informacion mbi çmimet, primet, kostot, fitimet apo çdo element tjetër që mund të ndikojë në përcaktimin e çmimit fundor të policës MTPL;
 - ii. Palët duhet të raportojnë pranë Autoritetit të Konkurrencës për masat e ndërmarra për sigurimin e mosfalsifikimit të policave MTPL të brendshme;
 - iii. Palët vendosin në dispozicion të Autoritetit të Konkurrencës informacionin e shkëmbyer sipas marrëveshjes sa herë që kërkohet.
 - iv. Të hiqet pika 8 ku thuhet: “Tregtimin e policave të sigurimit të detyrueshëm për mjetet e transportit për përgjegjësitë ndaj palëve të treta vetëm në pikat e autorizuara të seilës prej kompanive”.
- V. Në pikën II.6 “Kontrolli i zbatimit të marrëveshjes” të shtohet:
- i. Në rast përjashtimi të palëve nga marrëveshja, duhet të njoftohet Autoriteti i Konkurrencës për këtë fakt;
 - ii. Byroja Shqiptare e Sigurimeve do të monitorojë zbatimin e marrëveshjes sipas kushteve dhe detyrimeve të përcaktuara në dispozitat e këtij vendimi, duke siguruar që marrëveshja të mos kufizojë produktin MTPL apo shitjet, të mos ndajë tregun apo klientët që blejnë produktin MTPL dhe ndërmarrjet pjesëmarrëse në këtë marrëveshje bashkëpunimi duhet të mos kenë rënë dakord për primet e shitjes, të zbatuara për produktin MTPL.
- VI. Monitorimin e zbatimit të këtij vendimi për një periudhë 3 (tre) vjeçare.
- VII. Ngarkohet Sekretari i Përgjithshëm për zbatimin e këtij vendimi dhe njoftimin e palëve të interesuara.

Ky vendim hyn në fuqi menjëherë.

KOMISIONI I KONKURRENCËS

 Leida MATJA () Zë/Kryetar	 Rezana KONOMI () Anëtar	 Durim KRAJA () Anëtar	 Fatjola DELIJA () Anëtar
---	---	---	--